

## Aprofondiments su la Fieste de Patrie dal Friûl

**LA FIESTE DE PATRIE DAL FRIÛL** – La Fieste de Patrie dal Friûl e je une manifestazion che dal 2015 e je stade ricognossude in maniere uficiâl de Regjon Friûl-VJ par memoreâ e valorizâ lis fondis, la culture e la storie di autonomie dal popul furlan. E je une ocasion par celebrâ, in comunitât, i valôrs culturâi e linguistics che i furlans si ricognossin ogni di e che midiant di chescj a afermin la lôr identitât. Parcè che la Fieste, in plui che memoreâ lis origjins dal Patriarcjât e de Patrie dal Friûl, e fâs propit chest, fin de sô prime edizion, celebrade a Aquilee tal 1977 su iniziative di Pre Checo Placerean.

Ogni an, cun di plui, lis celebracions de Fieste dal Friûl a son insioradis, su dut il teritori furlan, cuntun **calendari di events culturâi colaterâi**, promovûts di ducj i Comuns che a àn aderît al bant de ARLeF, in atuazion de Leç n. 6/2015 pe poie des manifestacions che a acompagnin la ricorence.

**AI 3 DI AVRÎL, NASSITE DAL STÂT PATRIARCJÂL** – La storie nus conte che ai 3 di Avrîl dal 1077, a Pavie, l'imperadôr Indri IV al decretà la nassite dal Stât patriarcjâl furlan, metût intes mans dal Patriarcje di Aquilee. Il Stât furlan al veve leçs propriis, un so esercit, al bateve monede e al jere un dai teritoris statâi plui grancj de sô ete. Al è durât fin al 1420 cuant che, dopo di une vuere lungje, al fo conquistât de Republiche di Vignesie.

**PRIN PARLAMENT DE EUROPE** – Daûr di tancj studiôs, chel dal Friûl al è stât il Parlament plui antîc de Europe. Al è nassût des assembleis consultivis dai nobii e dal clericât, clamadis dongje dal Patriarcje di Aquilee za dal secul XII, par domandâ gnovis contribuzions in monede e di oms in armis. Tal zîr di pôc timp, dut câs, il Parlament de Patrie al à cjapât sù funzions legjislativis, aministrativis e judiziariis simpri plui impuartantis. Inte Assemblee, dongje dai nobii e dai ecclesiastics, si sentavin ancje i rapresentants dai Comuns. Al à operât par plui o mancun 600 agns, fin al 1805 cuant che Napoleon lu à sierât.

**LA BANDIERE DAL FRIÛL, UNE DES PLUI ANTIGHIS DE EUROPE** – La bandiere dal Friûl e je un dai simbui inconfondibii de Patrie, che ducj i furlans, ancje i coregjonâi tal forest, si ricognossin. E je une des plui antighis de Europe e e je ricognossude, inte version moderne, cu la leç regionâl numar 27 dal 2001. La acuille eraldiche colôr aur cu lis alis displeadis su fonts colôr celest si ispirè al vessil antîc e preseôs di Beltram, conservât intal Museu dal Domo di Udin dal secul XIV: un drap maraveôs di forme cuadrangolâr, di sede grise celeste, là che tal mieç e je une acuille cul cjâf voltât a man çampe. Il cuarp, lis çatis e lis alis a son zalis, lis sgrifis rossis. La sô origjin e rimonte ai timps dal Stât patriarcjâl furlan. Il vessil al jere part dal furniment funerari dal patriarcje Beltram di Saint Geniès, al podê su la catidre di Aquilee dal 1334 al 1350, e copât in maniere barbare par vie di une conzure di nobii furlans. Il simbul de acuille, lu confermin i reperts numismaticis,

### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF** CALT relazioni pubbliche / e-mail: [arlef@caltpr.it](mailto:arlef@caltpr.it)

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

